



Sesida dals

15 da zercladur 2026

Communitgà ils

18 da zercladur 2026

Protocol nr.

431/2026

Incumbensa Kreiliger

concernent las consequenzas finanzialas per il maun public pervia dals donns da selvaschina en il gaud

Resposta da la Regenza

La Regenza è conscienta dals problems actuals en connex cun la regiuvinaziun dal gaud, tant areguard la garanzia da las prestaziuns dal gaud, en spezial la funcziun da protecziun, sco er areguard las consequenzas finanzialas respectivas. La problematica gaud-selvaschina è ina sfida complexa, perquai ch'ils interess ecologics, economics e socials ston vegnir accordads in cun l'auter en in sistem ecologic dynamic. En quest connex fruntan process natirals, pretensiuns da segirezza e d'utilisaziun da la glieud sco er cundiziuns generalas giuridicas in sin l'auter, e savens stat-tan quests differents interess en ina relaziun da tensiun in cun l'auter. Populaziuns da selvaschina d'ungla memia grondas, adattaziuns dals spazis da viver pervia da la midada dal clima sco er pretensiuns creschentas da la societad envers spazis da recreaziun èn elements centrals en la discussiun davart il tractament dal gaud.

Ils problems da la regiuvinaziun dal gaud èn complexs e pretendan soluziuns cum-plessivas, che cumpiglian ina cumbinaziun tranter la reducziun da la populaziun da selvaschina, ina cultivaziun dal gaud resilienta al clima e mesiras da protecziun specificas. La strategia «Spazi da viver gaud-selvaschina 2021» resguarda quests connexs multifactorials. Ella ha la finamira da reducir la populaziun da selvaschina d'ungla ad ina dimensiun supportabla e da rinforzar la resistenza dals gauds a vista mesauna.

Tar il punct 1: Dapi l'onn 2021 publitgescha l'Uffizi da gaud e privels da la natira mintga primavaira in rapport curt davart la situaziun actuala dals donns chaschunads da la selvaschina d'ungla en il gaud. En quest rapport curt vegnan explitgads primarmain ils resultats dal giudicament da l'influenza da la selvaschina, il qual vegn fatg mintga dus onns. Là vegnan er gia publitgads ils custs per las mesiras da prevenziun cunter donns da selvaschina ch'èn vegnidas realisadas l'onn precedent e che vegnan sustegnidas cun contribuziuns federalas e chantunalas.

Tar il punct 2: Pervia dals connexs complexs n'èsi betg pussaivel da registrar las consequenzas finanzialas dals problems da regiuvinaziun – en spezial la perdita da tschertas spezialas da bostgs adattadas a la midada dal clima, l'omogenisaziun da las

spezias da bostgs sco er la prolungaziun da las periodas da regiuvinaziun – cun la qualitat necessaria a maun da calculaziuns approximativas, analogamain als models da prognosa da l'economia. Las ulteriuras consequenzas finanzialas, che vegnan integradas supplementarmain en il rapport curt annual a partir da l'onn 2027, cuntegnan indicaturs davart ils suandants temas:

- ils custs dals posts chantunals spezialisads u da terzs incaricads per eruir donns da selvaschina, inclusiv ils custs da las retschertgas davart l'influenza da la selvaschina sin spezias da bostgs adattadas a la midada dal clima, quai en il rom da la campagna Program parzial 7 (PP7) per examinar las finamiras da la strategia «Spazi da viver gaud-selvaschina 2021»;
- ils custs per mesiras da prevenziun cunter donns da selvaschina, che cumpiglian ils custs per singulas mesiras da protecziun, per saivs da protecziun cunter la selvaschina e per mesiras da protecziun chemicas, ils custs supplementars ch'èn resultads dapi l'onn 2022 en la tgira dal gaud da protecziun pervia da l'augment da la tariffa da contribuziun a 90 pertschient resp. a 100 pertschient (empè dad 80 pertschient) en consequenza da la strategia «Spazi da viver gaud-selvaschina 2021», sco er ils custs per gronds projects da saivs e per mesiras selviculturalas accompagnantas;
- la monetarisaziun da l'effect da l'influenza da la selvaschina a lunga vista, sin basa d'exempels concrets che cumpiglian ils custs supplementars en ils gauds da protecziun durant 50 onns.

Sin basa da questas explicaziuns propona la Regenza al Cussegl grond d'acceptar l'incumbensa qua avant maun concernent il punct 1 e da la midar sco suonda concernent il punct 2:

Sco consequenzas finanzialas valan – ultra dals custs per la prevenziun cunter donns da selvaschina – en spezial er:

- a) ils custs per registrar ils donns da selvaschina (incl. atgnas prestaziuns dal UGP, dal UCP, dals proprietaris da gaud, incaricas a terzs);
- b) ils custs per mesiras da cumpensaziun selviculturalas ed architectonicas;
- c) las consequenzas finanzialas pervia da la reducziun da las prestaziuns dal gaud, sco ina protecziun reducida cunter privels da la natira e perditas tar ils retgavs da la raccolta da laina;
- d) exempels concrets èn admess.



En num da la Regenza

Il president:

Martin Bühler

Il chancelier:

Daniel Spadin